

Prome Minister Eman na ceremonia di groundbreaking di Plaza Padu

"Cu e Plaza aki nos kier bisa Padu 'nos ta stimabo y nos kier reconocebo'"

CEREMONIA di 'groundbreaking' di Plaza Padu dilanti di edificio Co-

colishi tabata reflesho di e ambiente cu ta siati rond Aruba. Un ambiente di positivismo y solidaridad durante un ceremonia modesto na unda e persona principal 'Padu' Lampe a haya tur atencion cu e merece. Padu ta un persona masha stima y un bes mas esaki a keda demostrá e atardi aki.

Prome Minister Mike Eman a recorda tur presente cu aparte di ta un musico tur afo cu a produci cancionnan inolvidabel manera nos Himno Nacional y 'Abo so' Padu a aporta tambe grandemente a'e lucha pa nos por a haya nos Status Aparte.

Un lucha, un anhelo di e pueblo di Aruba. Padu a cana huntu cu lidernan politico di e tempo ey pa yuda den colecta firma ya para schouder cu schouder cu esnan cu a inicia e

lucha grandi y sagrado aki.

E diahuebs atardi por a siati e nostalgia di e tempo ey ora Eman a papia di dje. "Ora cu ya e lucha tabata inculca den e curason di cada Arubiano, Padu a sigui construi riba e sentido di identidad cu ta haci un pais. Un pais ta un lugar cu su suelo, su poblacion y su identificacion cu e suelo y su poblacion. Padu a duna nos e instrumentonan pa nos por a identifica nos mes cu nos dushi tera". Dirigiendo su mes na Padu Mike Eman a añadi "cu no tin nada pa kibr'e".

Eman a sigui bisa cu dor di Padu nos a a haya e sentimentonan di por papia di cordialidad.

"Di con bunita nos isla ta y cuanto nos ta stim'e. Sin e sentido di compromiso ey cu bo pueblo, bo suelo stima, bo no por construi un pais.

Ta poco personalidad nos tin na Aruba cu a duna un contribucion a'e aspecto politico y e desaroyo constitucional y a duna un contribucion valioso pa eternidad den crea e vinculonnan entre nos como ciudadanonan cu e suelonan stima di nos dushi tera Aruba".

Prome Minister Eman a bisa cu na cuanto Plaza duna Padu y ai con grandi e Plaza ta, nunca esaki por expresa e grandura di e gratitud pa loke Padu aifica pa historia di pais Aruba.

"Esaki t'e manera cu nos kier bisa Padu 'nos ta stimabo' y nos kier reconecebo cu pa semper e nomber di Padu lo keda compaña e nomber y historia di Aruba, Dushi Tera".

Na final Eman a yama Padu danki pa tur loke el a contribui y haci pa Aruba.